

تورکستان

(ترکستان الحقة)

علمی ، دینی ، ادبی ، تاریخی ، اجتماعی ، توجیهی ، آیلیق مجله دور .
 صاحبی وناشری : محمد امین اسلامی . ورئیس تحریری : محمد صادق افندی عاشور دور .
 اهل فضل تورکستان لیق لر دین برنجه ذات لر هیئت تحریر اعضا لری دور

ییل (۱) محرم و صفر ۱۳۷۴ هجری . سبتمبر و اوکتوبر ۱۹۵۴ برنجی سان

صفحه

۱	اداره	آراد تورکستان چیقیشی مناسبتی بیله
۳	محمد امین اسلامی	تورکستان تاریخی (باش سوز)
۵	»	جلالالملک سعود حضرتارینه تحیه
۷	سماحتلوسید مبشر طرازی	اسلام نظر نینده استقلال
۸	فوزیه خانیم نافذ	عائله ده خاتون
۹	م. ا. اسلامی	دینی تاریخیمیز نه اوچون هجری ؟
۱۳	فضیلتلوشیخ محمد یونس	حدیث شریف قسمی (دینی بولوم)
۱۴	م. ا. اسلامی	قوتاتقو بیلیک و مؤلفی یوسف خاص حاجب
۱۷	»	قورچاق حاجی لر .
۲۱	»	ملی شعر و اتالر سوزی و قسمه حکایه لر ادبیات بولومی
۳۴	اداره	اخبار بولومی - اسلام دنیاسی و تورکستان خبر لری دین
۳۰	م. ا. اسلامی	مصرده کی تاریخی اثر لر دین عمرو بن عاص جامعی
۳۲	اداره	قایغولوق خبر (عیاض بگ اسحاق و فانی)
۳۳	اداره	مصرده تورکستان مجله سی حالیدین

بیلە یزیش

(۱) حرمتلو وپنداش لریمیز دقتی غە «آزاد تورکستان» حقیقی مناسبتیلە تبریک و تورلو قیمت لیک فکر لرینی یوللاماق التفائیدە بولغان وحسن علاقه کورساتکن پوتون وپنداش لریمیز غە تشکر لریمیز نی سونامیز. بزچه غایت اعتبار واحترام بیلە باقیلغان اوفکر لرنک بعضی سینی اوزیمزدین بولغان سبب لر غە کوزە حاضر غە چه تنفیذ اددور الما کان اوچون تأسف بیلدورامیز، مجله نی قولیدە کی حقوقینی ملتیمیز اوچون ساقلاب قالیش حسن نیتی و ضرورتی ایله حاضر فی رویش ده نشر ایش گه توغری کیلیدی. کوپ مجله لر بر اسم و یا بر تورلی اداره اصولی بله بر نچه زمان دوام اتکن دین کین اوزگارتیمش دور. محلی قانون دائره سی ایچی ده کی هر نه آنکلاشمه و اوزگارتش لرغه مستعد لکیمزنی بلدور امیز و بزنی حاضر غه معذور تووشقایلر.

(۲) بعضی ذات لرننگ مجله اسمی «مظلوم تورکستان» بولسه یخشی بولماس میدی؟ دیگن دیک ملاحظه لریدی اولرنک «آزاد تورکستان» کله لرینی نحو اصطلاحی ده کی مبتدأ و خبر مفهومیندە آنکلاغان لیتی کورونا دور. تورکستان ننگ تمام اسپر لیتی همه کیمنه غه معلوم دور. و تورکستان نیک آزاد بولوشی قورتولوشی هر کیم نیک آرزوسی و تمنا سی دور.

«آزاد تورکستان» اسمی تفاؤل هم آیدیه و مقصد فی اسم دین بیلدوروش قبیله سی دین دور. ایکنجی عبارت بیلە ایتقان ده عربچه ده خبر صیغه سینی دعا و تمنا یریکه استعمال قیلمق بابی دین دور «رضی الله عنه» اوخشاش.

آبونه و تورلوک یوللاما (مراسله) لر اوچون ادریس حاجی محمد امین اسلامی «آزاد تورکستان» مجموعه سی مدیری نمر ۳ شارع سوق الخضر میدان عتبه القاہره مصر.

ADD,

M. A. ISLAMI (manager of AZAD TURKISTAN MAGAZINE)
NO. 3 Souk el-khadar ST, Meidan Ataba, CAIRO, Egypt.



جلالة الملك سعود

عاهل العروبة المضيف الكريم حامى التوحيد والحرمين

نشرف هذه المجلة فى أول أعدادها بصورة جلالته التى ارتسمت فى القلوب قبل الصحائف ونشرها عرفانا لأياديه وإقراراً بعطفه وعطف أسرته الملكية ، الذى استظل به المهاجرون التركستانيون راجين أن يتقبل منا هذا الشكر المتواضع إلى أن يأتى اليوم الذى يتحرر فيه أربعون مليوناً بدينهم وعقائدهم وأوطانهم فى تركستان . ويومئذ يتقدمون جميعاً بشكر الأحرار إلى حامى الأحرار . حفظ الله ملك جلالته السعيد محروطاً من عنايته تعالى بالنصر والتأييد .

ئەۋلاد گۈرۈپچىسى

www.ewlat.org

www.uyghurkitap.com

ئۇيغۇرچە ماقالە، قەدىمىي ئەسەر ۋە قوليازىلار ئامبىرى

« آزاد تورکستان » حقیقی مناسبتی بیله

بویوک تورکستان نیک زور بر قسمی موندین اوتوز آلتیه بیله ایلیگری کونئیست استیلاسی آلتنده فالغاج امکان تاپقان هر بر تورکستان لیق آزاد دنیاغه پناه ایلیتیب هجرت قیلمق غه باشلادی .

۱۹۳۱ ده شرقی تورکستان اوز استقلالینی آلماق اوجون باشلاغان مبارک انقلابی ده چین کونئیست حاکم لریغه مدد بر مک بهانه سی بیله روس کونئیست لری شوم ایلیغ لری نی شرقی تورکستان غه هم قویدیله ، وایکینجی بویوک دنیا محاربه سی دین کین تخی ده محکم لاشتی لر ، بوفاجمه بیله تورکستان لیق لر نیک هجرت آقینی آرتدی . و بر میلیون غه یقین لاغان تورکستان مهاجر لری خارج غه اوزینی آلدی لر ، آزاد دنیاغه کونئیست لر غه قارشلی نفرت کون دین کون زیاده لاشتی ، هجرت نتیجه سیده تورکستان منور وزعیم فرقه لری نیک اوستیگه ایکی زور وظیفه یوکلانگن ایدی برنجی سی انسانیت واسلامیت غه کوپ خدمت لری تیکن تورکستان و تورکستان لیق لر نی و اولرنیک حال ، مقدرات تیلاک لرینی دنیا غه آنکلاتیش ، ایکنجی سی همه بارلیق و مطبوعاتی دین آیر یلغان مهاجر لر غه اوز تیلیده مجله و کتاب لر وجود غه کلتوروب اولرنی تنویر ایتمک . تورکستان منور لری اروپا و عرب مملکت لریده چین ده و هندوستان و پاکستان و تورکیه لرده آی لیق مجله لر و رساله لر و یرلیک مطبوعات ده مقاله لر نشر اتمک مجتمعه لرده محاضره لر سوزلامک یول لری بیله باباقی ایکی وظیفه لرینی اوتامک ده کمچیلیک کورساتمادی لر ، بوکون هم ترجمان ، ملی تورکستان ، تورکستان درنگی ، صوت الترکستان ، مجله لری خدمت کورمک ده دور لر ، دین وملت غه صادق خلقیمیز مونداغ حرکت لر نی تشجیع لاب توردی لر .

هر یرده خواهی مستقل و خواهی اسپر ملت لر نیک سیاسی مجله لری بار بولغان دیک علمی دینی و باشقه ساحه لرده هم مجله لری بولادور ، مجله لریمز نیک کوپی سی سیاسی غنه ماهیت ده بولغاج اوزتیلیمیز و عرب حرفی بیله ، علمی دینی تاریخی اجتماعی ادبی و ممکن قدر جامع بر مجموعه چقاریب خدمت قیلمق نی آرزو قیلورایدوک ، علم عرفان منبع لری

بلان باي ، مطبوعاتی بزرگه مساعد «مصر» نی بو مجله حرکتی غه اختیار ایلامیش ایدوک موندین اوج بیل اول بردفعه حرکت اتکن بولساق هم موفق بولمغان ایدوک ، مصر جمهوریتی نیک حاضر قی حکومتی مجله میز غه رخصت بردی ومونیک ایله تورکستان غه بویوک بر خیر خواه لیق کورساتمیش بولدی . مصر هر قچان مظلوم ملت لر طرفدار لیقی ایله معروف دور ، اندونسیا و پاکستان لر نیک استقلال دعوالری زماننده مصر نیک آلدیغی موقعی هر کیم چه معلوم دور ، فلسطین ومراکش لر دیک غاصب لر دین اوز حقینی قایتاریب آلیش یولنده جهاد قیلغان اسلام وطن لر یغه مصر نیک برکن امکانات لری کوز آلدیمیز ده دور . مصر حکومتی نیک بو یخشی لقیغه شکر وظیفه سینی تاریخ ذمه سیگه حواله قیلیب قویوب جزای خیر دعا سی غه حاضر ده اکتفا ایتیمیز . کم چلیک لریمیز نیک کوب لیکی غه قاراماسدین ، الله تعالی نیک زحمتی غه تایانغان حال ده «آزاد تورکستان» مجموعه سینی چیقارمق غه باشلایمیز .

مجله نیک هدف لری : برنجی مدنیت نیک مهم بیشیک لریدن بولغان وطنمیز بویوک تورکستان نیک جغرافی تاریخی و باشقه ساحه لریندن تدقیقات ایتب ، دنیا غه تونوتقی غه چالماق .

ایکنجی : تورکستان تورك لری نیک ملی مدنیتی وعنعنه سی ، استقلال یولینده کی جهاد و حرکت لری وینگی تاریخ لری حقیده معلومات برمک غه اوغراشماق .

اوجونجی : تورکستان وتورکستان لیق لر نیک اسلام نوری وعرفانی نی تاراتیش ده کورساتکن فعالیت لری واسلام دینی واسلام دنیا سی غه دائر بحث لر یازماق بیله هجرت ده کی یاش لریمز نیک دینی معلومات دائره لرینی کنگا یتماق غه اجتهاد قیلمق .

تورتونجی : آنا تیلیمز وملی ادبیًا تیمز نیک یاش نسلیمزه ساقلا نیب قالشی غه حرکت قیلمق .

بشنجی : هجرت حیاتیده تورلوك اغیر لیق آستیده یاشماق ده بولغان وطنداش لر میز نیک درد لرینی نیگیل لاتمق وأولر نیک آرارلیده علاقه و رابطه نی چنکتماق وأولر نیک حال لریدین یازیب تورمق غه غیرت اتمک .

« آزاد تورکستان » مهاجرت ده کی باشقه مجله لرغه کوچ قوشمق اوجون چقغان
لقینی اولر تقدیر ایتار لر وسووینج ایله قارشی الیب تشجیع لرینی آیاماس لر دیگن امید
ده دور .

« آزاد تورکستان » اوزیدین باشقه مسلکد اش مجله لر بلان فکر و معلومات تبادل
ایتشی حقنده کی قرارینی بلدورادور ، و اوزی نی مسلکی غه توغری کیلگن هر بر علم ،
قلم فکر ادب ایگه لری نیک بر منبری دیب تونویدور و اولر دین فکر و علم اوزوق لری
سور ایدور .

تأسیس قیلندیغی کون دین باشلاب معنوی یاردم ده بولغان ذات لرغه وهیئت
تحریریه اعضا لری غه و تشجیع برکن پوتون ذات لرغه رحمت لرینی سونوب اجر عظیم
لر دعا قیلا دور .

آزاد تورکستان اداره سی

ومن الله التوفیق .

تورکستان تاریخی :

باش سوز : تاریخ علمی انسان لر قدر قدیم ومهم بر علم دور منبع وحادثه لر نیک
انتقادی وواقعه لر نیک اسبابینی تدقیق ایتادورغان اصول وفلسفه لر قورولغان دین کین
تاریخ علمی داستان (چوچک - اسطوره) ماهیتندین اوزاق لاشیب استقرائی علم لر
قتاریغه قوشولیش دور . بورونقی چاغ لرده تاریخ کتاب لری غه فقط مخصوص عالم لر
ورغبت لی کشی لر مراجعت ایتار لرایدی اون توقوزنجی عصر نیک ایکنجی یاریمیده
تاریخ علمی هم باشقه اساسی علم لرغه اوخشاغان مدرسه لر نیک مختلف صنف لریده مهم
درس علم لریدین اولاراق اوقوتولمق غه باشلانمش خصوصاً یاش لرغه اوزملتی ومملکتی نیک
تاریخی نی سواورنیده ایچیر مک غه اهمیت بر یلیمش .

قهرمان تورک ملتی نی دنیاغه یتیشدورگان بویوک تورکستان اواننگ ، دنیا ننگ
اوج بویوک قطعه سیده مختلف نام لر آستیده معظم حکومت لر قورغان ، انسانیت مقدراتی

اوستنده مهم تائير لر قالدورغان مدنيت غه كوب خدمت لری يتكن اولادلىرى «توركستان» لىق لر نىگ تارىخ لرى هم اوزلىرى دىك زور ومهم دور . اتابابا لرىمىز مدنيت اساس لرىنى قوروش فاتح لىق كې زور ايش لرله مشغول لانب اوز ايز و ات لرىنى اوچمايدورغان قىلب زمان صفحه لر يده قالدورمىش لرايسه هم واقعه نامه لر يازمق غه دقت اتامش لر توركستان لىق لر نىك اوزلىرى طرفندىن ياز يلغان انگ اولقى تارىخى اثر « ديوان لغات الترک » محمود كاشغرى طرفندىن ، وقوتاتقو بىلىك ، كاشغرده يوسف خاص حاجب طرفندىن ميلادى اون برنجى عصر نىك آخر قى يار يمىنده ياز يلهش دور ، بوايىكى كتاب توغرى دىن توغرى تارىخ كىتابى ايماس دور ، لىكن توركستان وتوركستان لىق لر حقنده غير مباشر صورت ده كوب تارىخى معلومات بىرادور . حالبوكه توركستان حقنده چىن ، ايران هند ، واقعه نامه لرى وتارىخ لرى ده ميلاد دىن نچه منك بىل ايلگرى كى واقعه لر قىدا تىلمش دور ، توركستان لىق لر بىك بورونقى زمان لر دىن دنيا نىك قديم ملت لرى دىن بولغان چىن و ايران و هند لىلر ايله توغرى دىن توغرى مناسبت لرده بولونغان زور و قديم ملت بولغان لرى اوچون اولر حقنده باشقه لر معلومات يازماق اىجاب اتمش دور . چىن لىق لر اوزلىرى نى دنيا نىك انگ اسكى وزور قومى اولغان لرىنى دعوا قىلغان لرى حال ده توركستان لىق لر نىك اوزلىرى دىك زور و قديم بر ملت اىكن لكىغه اعتراف ايتارا ك چىن ده اىلىك امپراتور تونولغان ياعو^(۱) زمانده تاتان^(۲) ، دىيولا دورغان چىن نىگ بويوك بر قسى نى توركستان لىق لر استىلا اتكن لرىنى قىدايلا مېش لر دور .

« دواى بار . م . ا . اسلامى »

- (۱) ياعو (YAO) ميلاد دىن اىكى مېنك اوچ بوزاللىك آلته بىل اول كلىش دور .
(۲) جنوب ده سد چىن شرق ده مانجوريا شمال ده بايقال كولى شمالى غربى ده اير تيش بويلرى غرب ده قديم ووسون لر بولغان اولسكه لر غه چىن لى لر تاتان دىر لرايدى .
م . شمس الدىن نىك تورك تارىخى نىك جلد ۲ . صفحه ۹ غه باقىلسون .

جلالتلو ملك سعود حضر تلرینه تحیّه

وحی الهی غه مظهر بولغان وحق دین بنده لرغه آندین تارالغان محمد علیه السلام نیک توغولغان اورنی ، قبله میز نیک قرار گاهی عرفات ، مزدلفه ، منی ، صفا و مروه دیک مبارک مقام لر نیک جایی ورسول اکرم نیک مسجد ومدفن لری نیک خزینه سی بولغان مقدّس « حجاز » توفراق نیک پادشاهی وحامی سی ملک سعود ومحترم خاندانی غه بارچه مسلمان لر غه تعظیم و إخلاص وظیفه لرینی اوتامک لازم بولسه ، بوشفقت لیک پادشاه وخاندانی نیک بز تورکستان لیق لر غه اغیر وتاریخی هجرت کون لر میزده کورساتکن خیر خواه لقلری خصوصی رویش ده إخلاص شکر ودعا وظیفه لرینی آرتدورمش دور .

سعودی عربیّه نیگ . هر طرفنده عزّت وحریت ده یاشاماق ده بولغان اون سکر منک قدر تورکستان لی قرداش لر میز غه تماس اینتلیرایکن اولر دین برنجی مشاهده اینتا لادورغان احساس اولر نیک سعودی خاندانی وحکومتی غه بولغان شکر و صداقت لری دور ، حجاز ده کی تورکستان لیق لر همه سی ریا وشمعه شائبه لریدین یراق یرلر ده عائله بیغیش اولتوروش لریده ملک سعود واونیک خاندانی دین کورکن یحشی لیق دین بحث اینتشب کوز یاش لری بیلان دعا قیاغان لر یغه شاهد بولغان میز .

حجاز ده کی تورکستان لیق لر نیک بومنونیت لری باشقه مملکت لرده یاشاماق ده بولغان بر میلیون غه یقین ، اولر نیک قرداش لرینی علاقه دار وخوش قیلا دور عموماً تورکستان لیق لر نیک خوش لیق خفه لیق شکر وشکایت حس لر یغه مظهر بولمق اوزره چیقاپا شلاغان « آزاد تورکستان » برنجی سانی ده جلالتلو ملک سعود حضر تلری واو ذات طرفندین تمثیل اینتلگن سعودی خاندانی وحکومتی غه حرارتلی تحیّه وتشکر لرینی سوئق ایله اوزی نی مسعود بیلا دور .

بومناسبت ایله ملک سعود نیک پارلاق حیات تاریخ لری دین برنیچه سطر یازمق بیلان اوز صحیفه لرینی زینت لاندور مک ایستایدور .

ملک سعود ، سعودی مملکتی نی قورغان مشهور سعود بن محمد نیک اون بشجی نبیره

(تورون) سی دور .

۱۵ يىنار ۱۹۰۲ دە ملك عبد العزيز رياض نى فتح قىلغان ومجلان نى يىنگىن كىچە سى توغولغان امير سعود مملكتى نىك ظفر تارىخى بولمىش دور، شىخ عبد الرحمان مغيرىچ اتلىق بر عالم دين جلالتلو اتالرى نىك خاص نظارتى ده تر بيه آلغان امير سعود، كىچىكىندىن اوق مملكت نىك زور ومهم ايش لرى نى اداره اتمك غه ورزش اتمش دور تخى اون اوچ ياشنده ايكن « سبله » معركه سنى مهارت له باشقارمىش، بويوك انسان لرىنگى بر دولت يابر مبدأ نى قوروش ده، باش ته هر وقت اغير لىق لر چىكىشى طبعى دور. ملك عبد العزيز (غفر الله له) نىك هم سعودى مملكتى نى قوروشى آسان بولمامىش دور، بويول ده دوچار كلگن كوب مشكلات ومخالف لرنى يىنگىب نهايت مملكتى ده بويوكونكى نظام، امنيت، رفاھيت نى اورون لاشتورغان بويوك اداره چى عبد العزيز جنت مكان غه امير سعود هر بر حركت ده كوچلوق اونك قول بولمىش دور وعين زمان ده مملكتى بيله اسلام دنيا سى و باشقه مملكت لر آراسنده حسن علاقه و رابطه تامين ايتمك اوچون خارج غه كوب دفعه لر سفر ايتمىش دور.

۱۹۲۵ برنجى دفعه مصر غه كىلىب ايكى مملكت مناسبتى نى توز اتمش

۱۹۳۵ ايطاليا، سويسره، فرنسا، انكلتره، هولنده و بلچىكه پاى تحت لرىنى كىزىپ

قايتىش ده فلسطين و شرق الأردن لرنى زيارت ايتمىش دور. دوامى بار.

م . ا . اسلامى

اسلام نظرینده استقلال

تورکستان نیک بویوک علماء لریدین مبشرخان تورم طرازی قلمی بیله
برادریم محمد امین اسلامی ، کوب دین بیری ، محبوب وطن لری بولغان بویوک
تورکستان دین مهجور واوزاق ليقده قالغان مهاجرت ده کی عزیز برادر لریز گه عموماً ، دین
ووطنیت مسئله سی اوچون خصوصاً قولیدین کلگن خدمتنی تقدیم اتمک غرضی بیله
تورکستان لغتی وشيوه سیده بر مجموعه چیقارمق آرزو سیده ایدی . اخیراً مصر نیک نیگی
عهدی ده کی موقر حکومتی دین اجازت الیب « آزاد تورکستان » اسمنده بر مجله نشری غه
موفق اولاییلدی بو مجله اوز مبدأ و غایه سیغه بناء دینی اخلاقی تأریخی جنبه لرده (بویله مجموعه
لرغه زیاده احتیاج ده بولغان تورکستانلیق برادر لریز اوچون) فایده لیق بولوردییه امیدابتو
لادور . مجله نیک دوامی عموماً تورکستان لیق لریز نیک هر ساحه ده کی مساعده لریغه
باغلیق دور . مین اوز طرفیمدین بو مجمرعه نیک دوامی یولینده معنوی مساعده بولمق اوزره ،
عزیز برادر لریم وخصوصاً محبوب یاش ملی اوغلان لریم افاده سی اوچون یوقاریده کی
عنوان آستنده عاجزانه مفکوره ام نی سلام و محبت لریم له برابر تقدیم اینامین .

استقلال : بو لفظ عربی بولوب اسلام ده بین الملل شکلنده شایع و مستعمل کلمه
لردین دور ، استقلال هر بر ملت نیک اوزلیک حا کیتندین عبارت دور ، استقلال ،
ملت توپلانته سی ذمه سینی اجنبی نیک اسارت زنجیریدین واونیک حا کیتی غه انقیاد
و اطاعت باغلامدین قورتارا دور . استقلال ، ملت افرادی واولر نیک حا کم و مسئول طبقه
لرینی اجنبی مستعمر لرغه مدهانت و جاپلوس لیق و خوش آمدقید لری وکشن لریدین
چیقار ادور . و نتیجه ده ملت افرادی اوزلری ایستدی کچه علم ، عرفان اجتماع ، اقتصاد
اخلاق ، سیاست ناحیه لرینده ترقی نیک کتته بولی (شاهراهی) غه ارشاد و سوق اتیادور ،
ملت نیک سویه و مرکزینی یوکسل تیب مستقل ملت لر قناریده ، ایرکین ، آزاد ،
خُر یاشامق عزتی غه ایریشدور ادور . و او ملت نی انسانلیق دنیا سی ده آزاد مملکت
و مستقل حکومت اداره سیغه ایگه قیلا دور . شونیک اوچون استقلال انسانیت حیاتنده
انک مطلوب و محبوب برشی دور . هر بر ملت نیک طرفندین محبت اتیلگن و علاقه لی

بولغان بو استقلال حصولی اوجون بشریت تاریخنده مختلف مملکت لرده وتورلوك زمان لرده محاربه لر بولمیش وقان لر توکولمیش وقرئان لیک لر بریمش دور ، بولقده وتوکولمقده وبریمق ده دور .
تبادی دوامی کیله سی سان ده .

عائله ده خاتون .

مشهور بویوک استادیمیز قاضی عبدالرشید ابراهیم نیک قزلی محترمه فوزیه خایم نافذ قلمیله .

خاتون عائله نیک روحی وملت نیک حیاتی دور ، هر بر عائله هر قایداغ بر مملکت بولسون اونیک انگ بویوک اعضا سی وانک ابتدائی تشکیلاتی دور . بر دولت نیک ایلیک قورولوشنده تصوراتیلادورغان نظارت لر نیک اساس لرینی عائله ایچیده استاب بیلامیز . بر مملکت نیک کمالی یاخود زوالی اونیک مالیه ، داخلیه معارف نظارت لری تیک ترقی سی یاندنی سی غه باغلیق دور ، اگر بر مملکت ده بو اوچ نظارت موفقیت بیله چالشسه او مملکت ده ترقی یول لری تأمین اولونمیش دیمک دور ، بر عائله حیاتی ده ایسه خاتون بو اوچ نظارت نی اوستیکه آلمان دور ، او سبب دین خاتون عائله نیک انگ مهم اعضا سی دور ، اگر خاتون وظیفه سی بولغان واوستی گه یوکلانگن بو اوچ ایش نی موفقیت بیله باشقارسه عائله مادی ومعنوی راحت ده بولور . هر برای نیک بای بولسون فقیر بولسون داخلی ایش لری خاتون نیک مهارت واقتداری غه باغلیق دور ، خاتون اوی نی واردائی (کیریمی) غه کوره تنظیم اتیار ، اولادینی برچی آتا آنا لری غه صادق وایکنجی دین وملت ووطن لری غه باغلیق برفرد اولاراق یتشدریر ، اخلاق واستعداد لرینی یوکسل تیر ، هرجهت دین ملت ووطن غه فایده لیق بر عنصر بولوب یتشمک لری غه غیرت اتیار .

انتشاری نی بک سووینج وخوش لیق بیله قارشی لادیغمیز « آزاد تورکستان »
مجموعه سی نیک هدف لری دین بری ده خاتون نیک اوستیغه یوکلانگن بو اوچ مهم مسئله لرده اولرغه یاردم چی بولق دین عبارت بولسه کرک . دین وملتی نی یاراتقان

ئۆلکۆنۆرۆپۆسی

www.ewlat.org

www.uighurkitap.com

ئۇيغۇرچە ماقالە، قەدىمىي نەسەر ۋە قوليازىلار ئامبىرى

(سویگن) همشیره وقیز لریمز نیک هم بو خصوص ده یاردم چی بولوش لرینی کوچوق صورت ده امیدایتنا مین . اساساً مهاجر لیک ده یاشاغان تورکستان لی همشیره لریمز نیک کوبی سی وقتی بیله بویوک قهرمان روزور آدم لر یتیشدورگن اصیل برملت نیک قیزلری بولغان لیق لرینی ، تورکستان آزاد لیق حرکت لریده ایر لر یغه بویوک فعالیت لر بیله قاتناشقان لیق لری بلان وهم هجرت ده صبر وچیدام لیق بیلان چالشقان لیق لری کبی گوزل خصلت ومزیت لری بیلان دنیا غه اثبات ایتیدی لر و اتمک ده دور لر ، خصوصاً سعودی عربستان ده کی تورکستانلیق قرداش لریمز نیک اقتصادی ایلگری لامک لری یولیده خاتون قیزلر نیک غیرت لری دایما افتخار وتقدير لرغه لایق حرکت لردین دور .
فوزیه نافذ مصر قاهره .

دینی تاریمخیمز نیمه اوچون هجری ؟

قارشی آلدیغیمز ۱۳۷۴ هجری ینگی بیل مناسبتیله همته دین قرنیدراش لریمز نیک ینگی بیل لرینی تبریک لایمیز و بوییل نیک رفاهیت ونجات بیلی بولوشی نی الله تعالی دین تیلایمز .

هجری بیل باشی ، هر بیلی ، پیغمبریمز نیک ومهاجرین اولین نیک حق دین نی تاراتش یولنده چککن مشقت لرغه قارشی کورساتکن صبر شجاعت لرینی هر تورلوک قین چیلیق لرغه چیداب اوزلری توغولغان یرلردین هجرت قیلب همان جهاد لرینی دوام آندوروش لری نتیجه سیده الله نیک فتح ونصرتی غه یتیشیب اوزلری توغولغان مملکت لرغه اسلام نیک شانلی بایراقینی اوستون کوتارگن حال ده قایتقان لیق لرینی خاطر لاتمق بیله مسلمان لرده جهاد عزیمت صبر روحی نی ینگی لاندور ادور . اسلام منبر ومجمله لری هر بیلی بوفرصت ده رسول اکرم وصحابه کرام نیک سیرت ، و اخلاصلیق فداکارلیق لری واتحاد لریدین بحث اتمکله مسلمان لر نیک حال لرینی توزاتمک غه چالیشادور لر . بز تورکستان مهاجر لری اوچون اودات لر نیک حال لر یندین عبرت

اليب صبر وشجاعت لر يزني آرتدوروب مستقبل غه بولغان ايشانجه لر يزني کوچ لاندوروب اسلام ده انك بويوك شرف بولغان مهاجر ليغيميز غه لايق يخشى اخلاق و افعال لر بلان صفت لانيب اختلاف ميكروب لر يني يوقاتيش اوچون انك بويوك مهم درس لر آلا دورغان كونلر دور .

الله تعالى نيك رحمتي بر زمان يابر مكان غه خاص ايماس دور اولقي مسلمان لر غه اوچوق بولغان الله نيك رحمت ونصرت خزينه لر ي نيك ايشيك لر ي اولر نيك يوليدن يورساك بوكون بز گه هم اوچوق دور .

اسلام تاريخي نيچوك وضع قيلنغان ؟ عموماً شرق خاقي ده مشهور واقعه لر بلان تاريخ تومتق بورونقي وقت لر دين حاضر غچه دوام اتكن بر عادت دور . توركستان ده قيرى آدم لر فلان ياغي ليق ده فلانه حادثه بولغان ايدى ديب سويلار لر ايدى . ياپون لرده هر بر ايمپراتور لر ي نيك تخت غه اولتورغن كوني اولرچه بويوك واقعه حساب لانغان غه دولت تاريخي هر ايمپراتور نيك تخت غه چيققان كوندين ينگي لاندور ، چين لي لرده عين حال جريان اتمك ده ايدى جمهوريت بولغاچ دولت تاريخ لر يني جمهوريت دين توتدى لر حجاز عرب لر ي ده هم مسلسل بر تاريخ بولما سدين مشهور واقعه لر بيلان تاريخ توتوش عادي بار ايدى مثلاً عام الفيل ...!

پيغمبر يمز غه وحى كيلگچ مسلمان لر آراسنده پيغمبر ليك كلگن دين تاريخ تونولور ايدى ومدينه غه هجرت اتكچ اسلام ده كي واقعه لر غه هجرت دين تاريخ الينور ايدى حضرت عمر نيك خليفه ليكي دين تورت بيل كيچيب كوب ير لر غه اسلام اورون لاشقاچ حضرت عمر دولت نيك كوب ايش لر يني تنظيم قيلمق غه باشلادى و اوجله دين اسلام ديني غه مسلسل بر تاريخ وضع قيلنش ني اصحاب كرام غه امر ايدى حضرت عمر اوزى بالذات تاريخ نيك باشى هجرت دين بولوشى غه طرفدار ايكن ليكيني هم ايما اتدى ، هجرت نيك اون يئنجى يلى ده اصحاب كرام نيك اجماي بيله پيغمبر يمز نيك هجرتي دين باش آلغان مسلسل هجرتي تاريخ اسلام تاريخي بولوب رسى لاشتى .

پيغمبر يمز عليه السلام نيك هجرت لر ي قايسى كون لرده بولغان بو حق ده تاريخ

ئەۋلاد گۆرۈپىنى

www.ewlat.org

www.uighurkitap.com

ئۇيغۇرچە ماقالە، قەدىمىي ئەسەر ۋە قوليازما لار ئامبىرى

علماء لری آراسنده برایکی یا اوچکون فرق لیک روایت لر باردور ، اما معتدل قول لرنی آلساق توبن ده کی نتیجه غه کلمک ممکن دور . صفراآی نیک یگرمه یتنجی کونی پنجشنبه سحری پیغمبریز مکه مکرّمه دین چقمش لر . ثورغاری ده اوچ کون توروب ربیع الاول نیک برنجی کونی یکشنبه مدینه منوره غه قاراب یورگن بو مبارک قافله مسافه نی سکزکون ده قطع اتیب قبا غه ربیع الاول نیک توقوزنجی کونی دوشنبه یتشمش لر ، اونده اوچکون راحت لانیب اون ایکنجی ربیع الاول ده قرآن کریم ده « أسسَ علی التقوی » آیتی بیلان یادلانغان قبا مسجدی نی سالمیش لر واوندین مدینه منوره غه تشریف بو یورمیش لر دور (والله اعلم) .

لیکن محرم آی قهری بیل نیک باش آی بولوب تونولغان برآی بولغاچ حضرت عمر نیک ارشادی بیله یتمیش کون مدت تاریخ نی آله سوروب محرم آیندین تاریخ وضع قیلنش دور .

ایمدی ، پیغمبریز نیک توغولغان کونلری وایکنجی پیغمبریز غه وحی نازل بولغان کون واوچونجی پیغمبریز نیک مکه دین بیت المقدس (اسراء) واوندین معراج کیچه لری واقعه لری دیک اسلام غه تاریخ باشی بولوش غه یارایدورغان مشهور واقعه لر توروغلوک نیمه اوچون هجرت دین تاریخ الندی ، ذاتاً اسلام دینی نیک بالفعل دنیا غه تارالاشی پیغمبر لیک کلگن کون دین باشلانندی ، مدینه غه هجرت اتکن غه قدر مکه ده کیچرکن اون بر بیل ایچیده مهم ذات لر ایمان کلتوردی اسلام نیک اساسی قورولدی و بک کوب زور واقعه لر اوتدی نیمه اوچون بو اون بیریل نی اسلام تاریخی دین کیسیب هجرت دین تاریخ توتولدی ؟ اسلام دینی نیک اسرار لرینی یحشی بیلگن اصابت رأی ایله مشهور وصحابه کرام ننک انک عالم لریدین بولغان عادل عمر حضرتلری نیک بالذات هجرت نی اختیار قیلشی واصحاب کرام نیک بونیک غه موافقت لری البته زور بر حکمت غه مبنی دور . بو حکمت نیمه ؟ مقاله میز نیک توب مقصدی بو نقطه لر دور ، ، بو حق ده اسلام اثر لری وعالم لر دین استفاده اوزرینه بوکون غه چه بیلگن لریمز بولر دور :

(۱) حایه اتیادورغان بر قوت غه ایگه بولماغان بر نیمه نی حقیقی معنی سی بیلان بارو موجود دیب حکم ایتب بولمایدور ، قوت غه ایگه بولماغان بر مبدأ یا بر دولت و ملت نه قدر کوب بولسه بولسون تیزمحو بولوش خطری آلدینده دور ، اسلام دینی نی مدافعه قیلا دورغان قوت و دولت پیغمبر یز مدینه منوره غه هجرت اتکن دین صونک یأسیس قیلینمیش دور و جهاد عبادتی هم هجرت دین صونک مشروع بولیش دور ، اسلام نیک قوتی و دولتی بولماغان بیل لرینی تاریخ توتقان ده حساب قیلماسلیق بیلان مسلمان لرغه قوت و دولت و استقلال اهمیت لرینی بالفعل بیلدور و ملیش دور . افغانستان نیک ایکنجی استقلال بایر امیده بعضی اجنبی دیپلوماسی لر شاه دین یاش سوراغان ده مین ایکی یاش ده دیب جواب برکن شاه استقلال دین اول یاشاغان یگر مه بجه یاشینی حساب اتماسلیک بیلان تمام اسلام نیک بو روحی نی بیلدیر تمش دور . مدافعه ایتا دورغان قوتی یوق بر نیمه ، گو یایوق اورنیده دور دیگن فلسفه نی بز تورکستان لیق لر تاتیب قدرینی بیلدوک قوت لر یز آزلان کون دین باشلاب مملکتیمیز تا بتالادی دنیمیز ملیتیمیز مسخره ایئیلدی بای وزوراو مملکتیمز نیکک و اوتوز بش ملیون دیگن اوچوق نفوس نیکک قیمتی توشتی داخل ده کی لر محبوس و ذلیل و خارج ده گی لر قاچاق لیق مذلت لرینی کوتاریب بو یون قیسیب کون اوتکارمکک ده میز .

ایکنجی سببی پیغمبر یز اوز شخصی غه برار نیمه نی نسبت بر مک دین بک قاچنمیش دور دنیا ده آر غنه خدمت قیلغان آدم لر اوز اسمی نی منگولاشتورمک (تخلید اتمک) اوچون بناو شهر لرغه اسمی نی قویمق غه اوخشاغان حرکت لرده بولیش لر اما اسلام ده محمد علیه السلام نیک و اهل بیتی نیک شخصی غه نسبت بر یلگن هیچ بر نیمه یوقتور ، بلکه بالعکس قیامت غه قدر اوز اولاد لرینی زکات یمک دین محروم آیلامیش و ورته لری غه هیچ بر میراث قالدور مامیش دور آیت و حدیث لرده مسلمان لر نی مؤمن لر دیب ذکر ائیلش باشقه دین ده کی لر موسوی ، مسیحی ، عیسائی بودی دیگن اوز پیغمبر لری و دینی باشلیق لری نیک شخصی غه نسبت بر یلگن اسم لرله لذت و شرف حسن اتکن لری حال ده بز مسلمان لر محمدی و محمدان (MOHAMMEDAN) کله لری دین خوش لانا میز چونکه پیغمبر یز خوش لانا مس ایدی . خصوصیت نی اظهار

دورغان نیمه لرنی کریه کورا دورغان وهر بر حرکات سکنائی فقط عموم بشر نیک سعادتی والله رضای نی هدف اتکن رسول اکرم نیک سیرت وروحي نی یخشی بیلگن عمر فاروق حضرت پیغمبرغه و باشقه مسلمان لرغه عام بولغان هجرت دین تاریخ الیش نی اختیار اتکن بولسه کرک .

حضرت پیغمبر نیک مونداغ تواضعی و خلوصیتی غه مکافات اولاراق کلمه شهادت و تشهد و آزان و اقامت لرده مبارک اسمی الله تعالی نیک اسمیغه مقرون بولغان حال ده ایگیز مناره و منبر لرده بوتون دنیا ده بش نوبت کوک لرغه قدر کوتارالا دور ، و بچه یوز ملیون لاغان مسلمان لر هر کون آز غنه سی اون نوبت ، نماز لریده یادلا یدور لر ورفعنا لك ذکرک . من تواضع رفعه الله (صدق الله ورسوله)

اوجونچی سببی انسان نیک راحتی نی تأمین اتیا دورغان نیمه هر نیمه دین زیاده واول اوز وطنی دور ، اونیک اوجون وطن هر بر شیء دین عزیز دور ، اسلام ده وطن محبتی ایمان دین سانلیش دور .

بتادی

دوامی کیله سی سان ده

م . ا . اسلامی .

حدیث قسمی (دینی بولوم)

عن عبادة بن الصامت رضى الله عنه وكان شهيداً بديراً وهو أحد النقباء ليلة العقبة أن رسول الله صلى الله عليه وسلم قال وحوله عصاة من أصحابه « يا يعونى على أن لا تشرکوا بالله شيئاً ولا تسرقوا ولا تزنوا ولا تقتلوا اولادکم ولا تأتوا بهتان تفترونه بين أيديکم وأرجلکم ولا تعصوا فى معروف إلى آخر الحديث » رواه الشيخان .

دین اسلام نفس بشریه نی ظاهر باطن اعتقادات عمل و معامله و باشقه احوال لرده پاک لاما ق اوجون کوب اهمیت برادور ، چونکه نفس بشریه ایکی قوت دین مرکب دور ، بری قوت ملکی (فرشته لیک قوتی وصفتی) و بری قوت بهیمی . نفس ده بولغان قوت بهیمیه نیک ایستگانیکه قراب یورگن کیشی تورت ایاغ لی حیوان لر مرتبه سندن هم تو بن راق درجه گه کیلور ، حتی برکونی کیلور که بهائم مرتبه سیگه یتما کنی آرزو کیلور لا کین ممکن

بولماس، چنانچه قیامت کوئی بهائم لرحساب وقصاص دین صونکره توفراق اولارلر بیتارلر جهنم غه کیرماس لر اما کافر لری که جهنم عذابى ده همیشه قالور لر اولر آرزو اتیار لر که کاشکی بز لر هم بهائم درجه سیده بولوب اولردیک توفراق بولوب کتساک و بو عذاب دین قوتولساق، لیکن آرزو لریگه یتالماس لر زیرا نفس بهیمی لری اولرنی یمان یول لرغه باشلاب او مرتبه گه تیکوز میش دور. الله تعالی نیک « و یقول الکافر یالیتی کنت ترابا » آیتی بونکا اشارت دور.

اما اگر انسان نفس ملکی مقتضا سیچه یورسه روحینی کوچ لاندورادور غان یخشی عمل لرگه مشغول بولسه قلبینی دنیا محبتی دین پاک قیلسه همه اعمال وافعالنده الله نی اونوتماسه وهر حال ده الله نی حاضر وناظر بیلسه نفس اماره نیک استا گمان نرسه لریگه مخالفت قیلسه فرشته درجه سندن اوستون درجه لرگه یتیشور.

جناب پیغمبر یمز امت لریگه اتا آنا لریدین آرتوق مهر بان وغمخوار ایدی لر اولرنی همیشه سعادت ابدیه یول لر یغه ارشاد ایلاب روح نی قوت لاندور ادورغان عمل لرغه ترغیب اتیار ایدی، ضرر وفلاکت لیک وانسان نی قدر یدین توشارا دورغان نیمه لردین اوزاق لاشتورمق غه کوشش قیلور ایدی لر، یوقاریده کی حدیث شریف بوقبیله دین دور.

دوامی بار

مصرده تورکستان جمعیت خیریه رئیسی فضیلتلو شیخ یونس قلمیله

قوتاتقو بیلیک و مؤلفی یوسف خاص حاجب

بیز تورکستان تورکلری نیک زمانه سی بله بیک ایلگری لاگان معارف ومدنیّت و پارلاق دور لر یمز نیک وثیقه وشاهدی اولاراق اتابابا لر یمز ننگ قالدورغان ایکی قیمت لی اثری باردور که بری « قوتاتقو بیلیک » وایکنجی سی « دیوان لغات التّرك » دور، بوایکی ادبی خزینه فقط تورکستان تورک لری اوچون غنه ایماس (دگیل) بلکه عموماً تورک ملّتی نیک بوکون گیچه تونولغان ملی ادبی اثر لری

مؤلاد کورویپنسی

www.ewlat.org

www.uyghurkitap.com

آراسیده انک قیمتلی سی وقدیمی اولاراق قبول قیلنمش دور .

موندین توقوز یوزبیل ایلگری ، تورکستان نیک علم دنیا سی غه تحفه قیلب یتشدیرگن و پوتون تورک ادیب و متفکر لری نیک ممثل لری سانالا دورغان یوسف خاص حاجب و محمود کاشغری لر طرفندین خالص تورکستان چه یاز یلغان بوایکی اثر ، تورکستان نیک پارلاق و آلتون دور لری و کیچمش لرینی تصویر اتمک بیله بوگونکی ضعیف توشکن کونلریز ده جان لریز غه جان قوشا دورغان و باش لریز نی یتنجی آسمان غه قدر کوتارا دورغان عامل لر دین دور . بونداغ اثر لر حقنده حرمتلو اوقوجی لریز غه معلومات سونمق نی مجله اوز کرک لریدن بیلا دور ، و بوعددی ده قوتاتقو بیلیک حقنده کی خلاصه معروضه میزنی تقدیم ایتایمیز .

قوتاتقو بیلیک نیک مؤلفی ، یوسف ، قراخان لرنیک قیش لیق پای تختی بولغان « بالاساغون »^(۱) شهری ده هجری ۴۱۰ میلادی ۱۰۱۹ ییل لری اطرافیده توغولیش ، اصیل بر عائله غه منسوب بولوب فضل و تقوا سی ایله خلق محبتی نی قازانمش ، یوسف ، فوق العاده اجتهادی وزکاسی سایه سنده زمانه سنده تحصیل قیلش ممکن بولغان علم لرنی قولیغه ایب عصری نیک یگانه بر متفکر و شاعری بولیش دور . بو یوک عالم لر دین ، قوتاتقو بیلیک نی تدقیق اتکن اوتو البرتس (Otto Albertes) یوسف نیک توغری دین توغری یا بالواسطه اسلام فیلسوفی ابن سینا نیک شاگردی ایکن لکیغه قناعت اتمش دور^(۲) فوآد کو پرولو (حاضر قی تورکیه خارجیه باقانی) حضرتلری البرتس نیک بو نظری نی فوق العاده جالب دقت دیمک ده دور^(۳) منصب صاحب لری و دولت رئیس لری ده تاپیلشی لازم کلگن صفت لرنی تعریف ایتیش ده

(۱) قیلیچ و قلم مجاهد لریز دین م . ا . بوغرا حضرتلری نیک شرقی تورکستان تاریخی نیک ۱۵۵ نجی صحیفه سیده ، بالاساغون ، حاضر قی توخاق شهری نیک یانیده بر شهر دیب قید ایتیلش دور ، حاضر قی اسمی نیمه معلوما تیزم یوق دور .
(۲) قوتاتقو بیلیک فلسفه سی کتابی نیک ۳۳۰ صفحه سی غه باقیاسون .
(۳) تورک ادبیات تاریخی استانبول صفحه ۱۹۲ غه باقیاسون .

يوسف بيله بويوك فيلسوف فارابی آراسنده بيك يقين بر فكر مناسبتى بولغاچ يوسف اوز همنامى ووطنداشى بولغان فارابی نيك اثر و فكر لر ينى هر كشى دين زياده بيلگن وانكلاغان لقينى قبول اتمك ممكن دور (۱) .

كتاب قايرده يازيلمش ؟ يوسف قوتاتقو بيليك نيك اخيرقى ياريمى نى قراخان لر نيك پاي تختى بولغان واوزمان ده « اوردا كنت » (۲) ديب آتالا دورغان حاضرقى « كاشغر » شهرى ده يازيلغان لىقى غه مؤرخ لر طرفندىن اتقاق قيلنمش دور ، فقط اولقى ياريمى نى دكتور رشيد رحمتى ارات و دكتور ديلمن لر اوزى توغولغان بالاساغون شهرى ده يازغان لىقى غه قائل دور لر . اما دكتور رضا نور يوسف كتابى نيك اولى نى قومول شهرى ده يازميش ديب قيداتمك ده دور بزكو پچيليك مؤرخ لر نيك قولينى ترجيح ايتاميز ، فقط دكتور رضا نور بالاساغون نى حاضرقى قومول ديگن فكرده مو ؟ يابالاساغون دين قومول غه كىلب كتابى نى انده يازا باشلاغان ديگنى مو ، بو نقطه مجهول دور .

كتاب نيك يازيلغان تاريخى : اثرى نى هجرى ۴۶۲ (۱۹۰۶) ده يازيش غه باشلاب اون سكرآى مدت ده تمام اتكن لكينى

بيل التمش ايكى ايردى تورت يوز بيله بوسوز سوزلاديم توتوب جان سوره توكل اون سكرآى ده ايديم بوسوز اودور دوم اديرديم سوزا وديب تره بيت لرى بيله مؤلف اوزى اوچوق لاماق ده دور . يوسف كتابينى كاشغرده تمام لاغاچ قاراخان لر سلاله سندن خان لر خانى توغاچ قرابو غراخان (ابو على حسن بن سليمان آرسلان) حضور ينده اوقوب واونكا تحفه اتميش دور ، خان شاعر نيك فضل و فكر و قلم قدرتى نى تقدير ايتيب كوب التفات ايلاميش و اوزمان ده خاقان ليق دين صوك انگ بويوك درجه بولغان « خاص حاجب » منصبى نى برميش دور اونيك

(۱) پروفيسور صدرى مقصودى نيك ار اسال حقوق فلسفه سى تاريخى نيك ۱۳۰ صحيفه سيغه مراجعت قيلينسون .

(۲) اوردا كنت پاي تخت شهر ديمك دور .

اوچون يوسف خاص حاجب ديب مشهور بولموش حاجب وزير ديمك بولوب «خاص» قوشولم يقچه اوزمان ده دولت ده الك يوكسك درجه بولموش دور .

دوامی بار .

ان شاء الله كيله سى سان ده قوتاتقو بيليك نيك معنى سى و بو كتاب نيك موضوعى و غايه سى و نسخه لرى و اهميتى غه اوخشاغان نقطه لردين بحيمزنى دوام اتدوراميز . م . ا . اسلامى

قورچاق حاجى لر .

ساويت قول آستيده كى اسير تورك مملكت لر يدين اوتكن بيل (بولتور) اون سكر و بوييل يگرمه بردانه آدم لر حج قيلمق اوچون كلدوك ديب بو طرف لرغه كيليب چيقغان مناسبت ايله اسلام مطبوعاتى ده قيزيل حاجى لر و روس حاجى لر عنوان لرى آلتنده مقاله لر يازيلدى . كونيست مملكت لر يده دينى منصب و لقب لرغه قدر خطر ليك اورنگ بيلان بوياليب قيزيل مفتى قيزيل حاجى ، قيزيل امام تعبیر لرى اورته غه كلك ده دور . قيزيل لفظى كونيست كله سى نيك مرادى بولوب قوللاماق ده دور . كونيست ليق و كونيست لر نيك هيچ بردين بيلان علاقه سى و برچه ليق ايش بریش لرى يوق دور . حاجى ديمك اسلام ده مكمل بر مسلمان ديمك دور بويوك بر شرف دور اونيكيچون كونيست ، حاجى بولمايدور ، و حاجى كونيست بولمايدور ، و بو اعتبار ايله قيزيل حاجى تعبیری توغرى ايماس دور ، و اوكلنگن آدم لر صاف تورك عرق لر يدين بولغاچ روس حاجى لر ديمك ده حقيقت دين اوزاق دور ، غير ارادى بر حرکات و سکنات لرى همه غه آب اوچوق كورونگن بوزواللى مسكين لرغه قورچاق (هيكل PUPPET) حاجى لر ديمك توغرى راق تعبیر بولسه كرك .

كونيست لر اوزايمبر يازمى آستيده كى مملكت لر نيك اطرافيه تيمور واوت دين قالين پرده لر اوروب او مملكت لر بيلان خارجى دنيا علاقه سيني قين لاتقان ليق معلوم دور . و او مملكت لر نيك ايجيده بر شهر دين بر شهر غه باريش كياش امكانيت لرى بك تار

بولغان نيك اوستيگه غايت اغير وينكچكه حكومت اجرا آتی غه تابع توتولغان لقيني ده بيلاميز. واونده كی خلق كونلوك ياك ايچمك واوز لرینی ايسيق سوغوق دین ساقلا يدورغان كیسوم لرغه ايگه ايماس محتاج حال ده ياشاغان ليقی ده بيلگیلی دور. حال بوايكن كوب چيقم و مخصوص طياره لر بيلان اوزاق ير لرني آيلاندوروب هر ييلى برنجه آدم نی حجاز غه كلتوروب ينه قايتاريب اليب كتش نيك سبب لری دین بری تخی روسياده دینی آدم لر و دینی عبادت غه حریت باردیگن فكر نی اسلام عالی ده قالدورمق دور. موندین اوتوز آلتنه ييل ايلگري دین حاضر غه قدر بزچه محترم بولغان سقال، سلّه (عمامه) تون يعنی ملی و دینی شكل لر دائمی رویش ده كومونست لر نيك كولكو ومسخره لر يغه معروض دور ايمدی او سلّه وتون لر بيلان بولر اسلام عالی نيك عقلی غه كولمگ چی بولالر. تازه اوخشاتيب، اوسته آرتيست لر ديك او دینی و ملی يونيفورم لرغه اورا نيب كيلگن بيچاره بوقورچاق لر اسلام دنيا سی ده انك حساس موقع لر وشخصیت لرغه اوز لرینی كورساتمك. و بازار غه سالماق غه اوغراشقان لرینی كوردوك وشيخ الازهر، مفتی الديار المصريه ديك اسلام عالی ده انك مهم ذات لرني زيارت قیلش او لر نيك برنجی هدفي بولغن لقینی ده مشاهده اتدوك. ليكن اسلام عالی او لر نيك اوسته لری او يلاغان چه غافل ايماس دور لر، هر قانچه حقیقت نی او لر ياشورسه لر هم « الشمس لا تطین » = كون نی لای بيلان چاپلاب اتكالی بولمايدور ديگن مقاله مصداقینجه خودی قورچاق حاجی لر نيك اوز لری نی روسیه ده كی دینی اضطهاد و محرومیت لر نيك بر شاهد لری اولق صفتی ايله تلقی اتكن مصر مطبوعات لری كوب حقیقت لر بيلان رأی عام نی تنوير ايندی لر. ذاتاً بز توركستان ليق لر اوتوز آلتنه ييل اوّل بيلگن نيمه لرني دنيا صونك راق بولسه هم بوكون بيليب بيتشمك ده لر كومونست ليق نيك دنيا ده كيچرگن فتنه لری زهر لاناغان سلامت باش و ذهن لرغه او لر نيك نيمه ايكن ليكنی دين عملی و صادق كوب درس لر بردی لر بوكون خُر آزاد دنيا ده ايكنی آدم يقه لاشيب قالسه او لر نی اوروش غه ساليب قويغان او چونجی كشی محقق كومونست دور ديگن توشونجه غه كيلا باشلادی لر و حقیقة شو نداغ دور. اونيچگون مونده بوقورچاق حاجی لر حقنده يازا دورغان بحميميز خارج

ده کی بز تورکستان لی لر بولرغه قاراتا قایداغ موقع آلماقیمز لازم دیکن نقطه اطرافنده فکر لاشتیق دین عبارت دور .

انسان لر نیک بر بریگه یقین لیتی مسلک ومبدأ ومفکوره بر لیکتی اعتبار یله اولچانا دور ، مفکوره ده باشقه بولغان بر انسان نه قدر یقین بولسه بولسون یات ودشمن حساب لانا دور ، حضرت نوح پیغمبر غه دینی مبدأ ده باشقه بولغان اوغلی نی الله تعالی « انه لیس من اهلک » دیب نوح علیه السلام دین نسبی قرابتی نی نفی اتمش دور ، کمونیست لر کیم اولسه اولسون بزگه یات ودشمن دور ، بو مقدمه دین مقصد یمیز کیلگن او آدم لر نیک همه سی نی کمونیست دیب حکم قیلغان لقمز دین ایماس ، لیکن آرلرنیده صاف وصادق کمونیست لر بارلقی نی هر بر عقل ایگه سی تخمین ایتیب بیلادور ، واولر قایسی سی بزچه مجهول دور ، خمر تامیب کتکن بر چیلک سو نیک همه سینی ، توکوب تاشلاغان دیک اولر نیک همه سی غه اوچوق یوز برماسلیک واحتیاط ده بولمق طرفداری میز . اولر دین مملکت حالینی بیلشمک چون کوروشمک فایده سز دور . چونگه مملکت نیک حقیقی حالی تی بزگه سو بیلامک غه اولرده اقتدار یوق دور . تورکستان ده ایکن میز اونک کوز لر چب کوز لرغه رقیب لیک حالینی آلمش دی ، بو نلرایسه بک اوچوق معلوم دور قاتیغ رقابت آستیده دور . بولرغه قاراتا ساووق شعور قاتیغ نفرت بیلدورمک ایله خارج ده کی قیلب یورگن سوزلریمز نی فعل ده کورساتمک ضرورتینی حس ایتیمزینه ایکنجی مهم بر طرفی بو دور که بز اوزیمز نیک کنک مملکت لریمز غه سیغالمای قاچب چیقیب خارج ده اعتماد وایشانجه لرغه مظهر بولمق اوزره یاشاماق ده میز البته دشمن لریمز نیک بو نیک غه ایچی پوشادور بو مرکز لریمز نی ضعیف لاتماق بزغه خارجی دنیا نیک ایشانجه لرینی آزلاتماق بو قورچاق لر نیک اوستی گه یوکلانگن ایش لر دین بری سی بولا بیلیر . خارج ده کی وطنداش لریمز نیک کمونیست لرغه کامل عداوت حس لرینی بک یخشی تقدیراتمک له برابر اولر نظریغه تاشلایدورغان ایکنجی فکریمز تورکستان خلقی کمونیست لیتی نیک قربان لریدین بولدوق ، ایمدی بز باشقه لر نی تنویر اتمک انسانیت واسلامیت واجب لریدین بولغان نیک اوستیگه حُر دنیا دین بز نیک کورگن وکوروب تورمق ده بولغان یخشی لیتی لر نیک بزگه یوکلاگن واجب لری دین دور ،

اسلام دنیاسی ده تخی ساده مسلمان لره هم آزیماس دور ، سعدی نیک « جومی بینی که ناینواچاه است اگر خاموش بنشین گناه است - یعنی بر کورو بر قودوق نی کوروب توروب شوک تورسانک کور قودوق غه توشوب کنسه گناهی سیکا بولادور ، دیگن حکمتلی سوزی چه اظهار حقیقت ده قصور اتماسلیک لازم دور ، تورکستان و باشقه تورک مملکت لری دین یول یراق لیقی وسفر مواصلات وسیله لری نیک ابتدائی بولوش لریغه رغماً اوزوقتی ده اون مینک لاب کشی حج غه کیلور لرایدی اگر بوگونکی کون لردیک سفر لری اونکای لانغان سفر وسیله لری یول لرنی قسقارتقان زمان لرده اوز دینی و حریتی و ملیکی و بای لیقی غه ایگه بولسه لر الیگ منک لاب حاجی کیلش ده هیچ شبهه بولماغان اوتورکستان و باشقه مملکت لر نیک قرق ملیون خلقی دین عجا یگرمه برکشی غه غنه حج مخصوص فرض بولش میدور ؟ باشقه لرنیمه بولدی ، بوکون یگرمه ایکی ملیون مصر خلقیدین یگرمه ایکی منک کشی حج قیامق ده دور حج موسمی سورون زمان ده کیلسه حاجی لر ایکی قات بولوشی نی تخمین ایتیمک ده دور .

آلدامچی لیق بیلان کشی لر نیک دوست لوقی و محبتی نی قازانماق زمانه سی آرتوق کچمیش دور ، چونکه بودور اویغاق لیق دوری دور . اسلام عالمی نیک فکرینی اوزیگه تارتماق و دوستلوقی نی قازانماق نیک انک قیسقه یولی و یخشی چاره سی اولر نیک قرداشی بولغان قرق ملیون تورکستان لیق نیک هر سناحه ده حریتی نی تأمین ایتادورغان استقلالینی برمک ایله غنه بولادور . وان شاء الله دشمن لر ایستار ایسناماس اوکون کیله جک دور .

یوقالسون خدیعه و آلدامچی لیق یاشاسون حقیقت .

م . ا . اسلامی .

ادیات، بولوي

سوزده تورمق

خلاف آسانك اگر ایغان سوزنیکدین کنار ایرکک لیکنک آتی اوزنیکدین
 چیقار ماغیل اغیز دین قیلماس ایش نی قیلورمن دینه قول دین کلماس ایش نی
 اغیز دین چیمسه سوز قاتیبار ماغیل فاش اگرچه کتسه هم اول سوز اوچون باش
 کرک ایرمین دیگن نیک وعده سی توز اگر توز بولمسه آندین کونکل اوز
 (صوفی الله یاردین)

زندان تام (دیوار) لریدین ^(۱)

نیچه بیل کزگن ایدم دیار غربت نی کورمیگن ایدم مونداغ عذاب وعقوبت نی
 عاقبت وطن گه کیلب خلق اوچون قیلب خدمت
 مکافات اوچون آلدیم بو آزار وکلفت نی
 طاقیم طاق بولدی مونده کی خلق ندا سیدین
 گاس بولدی قولاق لریم جارا قلیغان کشن صدا سیدین .
 هر شی بیطاقت بولادور بولر نیک آهی دین
 نه بولور بریول حکومت اوتسه بولر گناهی دین
 کون ده موشتوم دیک چالمه خط قیلب توگاب کتادور
 اوله دین چیقیب کتسام بوموم توگاب کتادور .
 (کیله سی سان لرده دوام لری بار)

(۱) ۱۹۳۷ اپریل جزال م . محیطی کاشغر دین چیقیب کتکن دین صونک کاشغر
 وجوارنیدین اوچوز الیگ مملکت کتبه لرینی کونست لر قولمه افغان اییدی شویلی ۲۹
 مایوده بولرغه تیریک کوینچه کیراسین یاغی چاپب یارباغ دروازه (G.P.O.) گونک عن
 جوزندانیده کوبدور دی لر بو شهید لر ایچنده بوبوک معارف چی میزآرتوش لوق محمد علی
 افندی نیک زندان تام لریغه یازیب قالدورغان شعر لری نی کوچوروب آلمان ایدوک اونیک
 چون بو عنوان نی بردوک کیله سی سان لرده مرحوم نی مخصوص مقاله بیله خاطر لایمز .

ایشیلاگان لر خوار اولدی

مجاهد لر یز دین طور فان لیق عالم ادیب عبد الله بك داملا

نعیمی مرحوم نیک همالایاتاغ لریده اتیقان قصیده لریدن ابریل ۱۹۳۷

ایشیلاگان لر خوار اولدی یمان لر اعتبار اولدی

یخشی لر یمان بولوب * جهان بز لرغه تارا اولدی * حیراننک بز الله کتار میز
کعبه الله غه (نقرات) بعضی بر منافع لر * نیت لری بوزوق لر * آرا ده آلا بولوب *
کونکل لر غبار اولدی .

دین یولنده یورکن لر * اوزدینی فی دیکن لر * آخشام لده آه تارتیب * یولدوزنی
سانار اولدی .

عاقبت ده اویلاشتوق * چیقیب کتنس غه توختاشتوق * تنکریمز نیک تقدیری
حرم غه یول آچار اولدی * همالایا اوزون تاغ دور * یول یمان یراق چاغ دور * علا جیمیز نیک
یوقیدین مایکش غه قرار اولدی * ایشیک لر اوچوق قالدی * چراغ لر یونوق قالدی *
غریب لیق ده کی اویلا * توتوغلوق قالار اولدی .

شهید لر قبری غه

(ختن فتح الدین مخدوم نیک ۱۴۹۹ ده اتیقان شعر لریندین)

نه عجب طالع سننیک ده سودیکم جانان وطن!
دائما باغرینیک ده قوپغای قان لادین طوفان وطن!
بر عصر تنج اوتما دینیک کوسونک ده هر خیل انقلاب
تفرافینیک ایچره کومولیش بی عدد انسان وطن!
هر غریچ یرینیک شهید اجدادیمز نیک قبری دور
ساقلاش استنحوان لرینی ایویوف تورغان وطن!
سن اوچون اولمک وطن اولاد لر نیک نیک فخری دور
بزگه بو خصلت بویوک اجداد له دین قالغان وطن!

شول سبب دین هر زمان یولنک ده قیلدوق جان فدا
بخت واقبالنک اوچون بردوک نچه قربان وطن!
آه کیم قربان قانی دین اونسه چوکیل غنچه لر
کیل یرینده یانتاق اونکیچ بز بونکما حیران وطن!
دوامی بار .

کنکاش (قرداش لریمیز ایدیله تورک لری نیک مشهور شاعر لری عبد الله توقال مجموعه آثار یندین) .

عزیز دوستوم سیکامین دین کیگاش شول
سرینک نی کشی لرغه سویلاماس بول
ایچنک ده نرسه یانغانین اوزونک بیل
اوزونک قایغور اوزونک یغلا اوزونک کول

نصیحت (قان داش لریمیز باشقورت تورک لری خلق شعر یدین)

آتیک بولسه تاقلات تو نونک بولسه یقلات (۱)
قیزنیگ بولسه بر کیاوغه چیقماس بورون یمان آت .

آتالار سوزی (ضرب الامثال)

آتالار سوزی حیات ده رهبر دور ، هر ملت ده زور اهمیت بیلان تویلا نیب ساقلانا دور ، تورکستان ده هم کوپ حکمت لی اتالار سوزی بار دور که بورونقی فیلسوف وحکیم اتانابا بالریمزدین اغیز دین اغیز غه کیچاراک بز غه قالمیش دور . چاچیلغان بوملی بای لقمز نی تو پلاماق یولیده علم و قلم ایگه لری و حرمتلو قیری (اختیار) لریمز نیک یاردمینی سورا میمز .
۱ - باش سونسه بورک ایچیده قول سونسه ینک ایچیده .
۲ - آنا کور قیز آل ، قیرغاق کور بور آل .

(۱) تون - بزچه جبهه . یا قالاتاق قیمت بهالی تیره لر دین اورومه یقه قویدور مق

دیگ دور .

- ۳ - هر یرده قران نیک قولاتی تورت .
- ۴ - ایلچی گه اولوم یوق .
- ۵ - ایچکو گه جان قایغو قصاب غه یاغ .
- ۶ - سن آغامن اغا ایناک لرنی کیم ساغا ؟ (آزر باجیان آتالار سوزیدین)

قیسقه حکایه لر :

ایش سیزوزارت : یاورو پاده سو ویچره مملکتی بز نیک دوغو تورکستان غه اوخشه دنگیزی یوق بر مملکت بولسه هم حکومت ده بحریه نظارت لری بار دور . بر وقت ساویت روسیه تبعه سی دین بری سو ویچره لی بری سیغه سز نیک مملکتشکرده دنگیز یوق نه اوچون بحریه نظارتی باردیب سوآل برکن ده ، بزده بحریه نظارتی بولوشی روسیاده عدالت نظارتی بولغان بیلان بردور دیب جواب قایتارمیش .

ان شاء الله مین : نصر الدین افندی خاتونیغه اگر ایرته هوا اوچوق بولسه تاغ غه اوتون غه بارامن یامغور یاغسه اوی ده اوشاق توشاک ایش لرایشلا مین دیمش دور ، خاتونی ان شاء الله دیگین دیسه بویکی حال دین باشقه نیمه بولورایدی ؟ دیب کولمیش . ایرته سی ایرته گمانده بیرمونچه عسکر لر کیلیب بزغه یول کورسات دیب افندی نی آلدیغه سالیب الیب کیتمش لر یامغور ده کون بوی پیاده سو کولداب یوروب عسکر لرغه یول کورساتیب آران قوتولوب اولگودیک بولوب کیچه سی اوییغه قایتیب ایشیک نی قاقسه خاتونی کیم سن ؟ دیمیش ، افندی ان شاء الله مین . دیب آقرین غنه جواب قایتارمیش دور .

اخبار بولومی

اسلام عالی احوالندین : بو برایکی آی ایچیده اسلام دنیا سی فایده سی اوچون تمام لانغان بک زور وتاریخی واقعه لرنی سووینج لر ایله قارشی آلدوق : برنجی ، حاضر قی مصر جمهوریتی نیک رجالی انگلتره نیک سووویس قنالننده بولغان قوت لرینی سلمی وتنج یولی ایله چیقارماق یولیده کی موقفیت لری دور ، بویکی دولت نیک بر آنگلاشمه غه کیلب دوست ودشمن ذهن لرینی مشغول قیلغان ودنیا چه بویوک مسئله لر دین سانالغان

نهؤلاد گورؤیسی

www.ewlat.org

www.uyghurkitap.com

تویغورچه ماقاله ، قدیمی نمره وه قولیازمیلار نامبری

بو مسئله بك چرابليق وهم مصر ملتی نيك فايده سيغه حل قیلب توکامکی بيله ، مصر اوز جسمی غه گرگن بر شیشق کبی تلقی ایتیب کوب راحت سرلانگن و کوب مادی ومعنوی جهاد لر یورتکن بو مسئله ده ینگی عهد نیک قهرمان لری دور ینده اوز تیلاک لر یغه یتیشیب استقلال لری نی مکمل سانامق ده دور مصر حکومتی وملتی نی بو موفقیت لری بیلان تبریک ایتامیز وشاد لقمز نی بیلدور امیز .

ایکنجی : بو ییل حج موسمی مکه مکرمه ده بر عمومی اسلام مؤتمری بولوب اوزدی بو مؤتمر غه جلالتلو ملک سعود بالذات رئیس بولغانی حال ده پاکستان حاکم عام ورئیس الوزراء لری ، ومصر باش باقانی جمال عبد الفاصر وافغانستان قرالی نیک وکیل لری باش ده بولغانی حال ده پوتون اسلام مملکت لر یدین مهم شخصیت لر قاتناشدی لر . وهر بیلی مکه مکرمه ده مؤتمر اوز دورمک غه قرار بر گن بو باش مؤتمر ، مؤتمر نیک دائمی سکر تیری اولاراق مصرده ثوره اعضا لر یدین حرمتلو انور السادات نی اختیار قیلدی تورکستان ، آزر بايجان دیک اوز حریت لر یغه مشتاق اسیر مملکت لر دین و یاپونیا و یاورو پادیک مسلمان آز چیلیق یر لر دین هم وکیل لر قبول قیامق غه بولغان عادل قرار لر ینی اعلان اتیدی لر . بو مؤتمر حقنده مصر مطبوعاتی دین « المصور » نیک خلفاء راشدین دوری دین صونک اوتگاز یلگن مؤتمر لر نیک ایگن مهم و بویوکی دیگن توصیفی نی مبالغه سز تاپامیز وتأیید ایتامیز ، بو مؤتمر قرآن کریم ده حج حکمتی ده « لیشهدوا منافع لهم » آیتی غه بر مظهر بولدی دیب خوش لانامیز ، بو مؤتمر غه اسلام عالی نیک مقصد وتیلاک لزی ومسلمان لر نیک برلیکی نی تأمین ایتش یولنده موفقیت لر تیلایمز .

اوچونجی : مصر نیک ارشاد قومی وزیر ی صاغ صلاح سالم حضر تلی نیک صونکقی آی لرده کی حجاز ، لبنان یمن عراق زیارت لری . اسلام دنیا سنده مهم بر انتباه و یخشی نتیجه لر قالدورمقی ایله ممتاز واقعه لر دین دور ، نشاط لی بو وزیر نیک خصوصاً عرب دنیا سی کله سی نیک حقیقی بر لیکینی تأمین قیلا دورغان بو زیارت لری هر بر مسلمان نیک تقدیر ودعا لر ینی ایجاب ایتادور .

تورتینجی : بوکونلر شرق الاردن قرالی جلالتلو حسین ، تورکیه نیک رسمی مهمانی بولمق ده دور ، اغسطوس ۲۶ ده استانبول نیک تقسیم میدانی ده ملک حرمتیغه

اوتىكاز يلىكن عسكەر استىراضى تورك لى نىك حاضرى قوت وقت ده كى بويوك قوت لى رىدىن
صادق بىر فىكەر بىراقش دور ، تور كىه رىئىس جىمهورى غه ، ملك حسين آلتون غىلاف لىق
بىر لىانت وىاقوت وانجور له مرصع قىتملىك بىر قلىچ هدىه تىقدىم آتمش دور .

شرقى توركىستان حال لى رىدىن : و . ۱۰ . ع . خبىرى بىنگى دهلى ده كى اعتمادلىق
دائره لى نىك اعلاىى غه كوره بىر مىليون دىن مرگب مىسلح ومنتظم بىر قىزىل اوردو شرقى
توركىستان بىله كشمىر نىك شامالى چىگار اسىده اورون لاشتورولمش دور . تهرت بوزاللىگ
مىليون لىق هندوستان وپاكىستان دولت لى نىك پوتون قوتى تىخى بىر مىليون غه يتابىدور .
سكز مىليون لىق شرقى توركىستان ده فقط كشمىر حدودى ده بىر مىليون عسكەر بولغان لىقى
« اهالى نىك باشىده كى اغىر لىق نى وهم كمنىست لى نىك حُر دىنا غه قاراتانه فىكەر ده
اىكن لىكىنى و تهدىد لى رىنى بىلدوروش ده كفايه دور » .

اوتكن بىل اون برنجى سبتمبر ده هندوستان حكومتى باش باقانى شىرى نهرو ،
كومنىست چىن حكومتى شرقى توركىستان منطقه سى پوتون سىياسى ممل لرغه قاپالىق واولر
نىك آنده توروش غه حقى يوق دىب اعلان قىلغاچ ، هندوسنان حكومتى اوزى نىك شرقى
توركىستان ده كى عمومى كو نصولات لى نىك قاپاتا جاغىنى هندوستان بويوك ملت مجلس ده
اعلان قىلدى ۱۵۹۳ / ۱۲ / ۹ .

غربى توركىستان حال لى رىدىن : ساوىت حكومتى موسكو ده كى انگلتره اىلچى
سى سىرو بىللىام هاىترغه (Sir. W. Haiter) اجنبى دىپلوماسى لى نىك بارىشى ممنوع
بولغان منطقه لى زىارت اتمك اوچون ۵۴ / ۶ / ۲۷ ده مخصوص رىخت بىر مىش دور
خاتونى وروس چه بىلادورغان اىلچى لىك سكرتىرى بىلان سفىر تركىستان مركزى بولغان
عشق آباد ده اىكى كون وقت كىچرىب اوندىن طىاره بىلان تاشكند غه واوندىن فاىز بىلان
كوب توركىستان منطقه لى غه كتمش دور . انگلتره سفىرى بوزىارتى دىن
سوزلار اىكن بارغان بىر لى رىده يعنى توركىستان نىك تورلى منطقه لى رىده كى خلق لى نىك
دىنا ده انگلتره دىگن بىر دولت بار لىقىنى بىلماكان لىك لى رىنى ، سفىر دىگن نىك وظىفه
سى اشى نىمه اوندىن هىچ خبىرى يوق لىقىنى واون منطقه ده كى خلق اعتمادى چه عالم ده
انك اوزاق نقطه موسكو بولوب موسكو دىن صونكره آرتوق دىنا يوق دىگن قناعت ده

ایکن لیک لری بی واو ملت لر نیک بک ابتدائی فطری بر حیات ده یاشاب مدنیت وحاضر
قی حال لر دین غافل لکینی تصریح بر میش دور اه . (۵۴ / ۶ / ۲۸)

مصر نیک معتبر کونلوك گزیتته لریدین اخبار الیوم نیک ۴۹۷ عددی ده مصرده
انک مشهور یازوچی لر دین استاذ محمد التابعی قلمی بیله « تیمور پرده آرقه سی - سوقوش
نیک تیز بولوشی نی الله دین تیلایدورغان ملت لر » عنوانی آلسیده اوزون بر مقاله باسیلیب
حقیقی بو فایده لیق مقاله نیک بعضی نقطه لرینی خلاصه قیلاراق ترجمه ایتمیز . بولاندا ،
ماجارستان ، رومانیا ، بلغاریا لرینی اول دین نچه دفعه زیارت قیلغان یخشی بیلگین
و بویقین کونلرده یه او مملکت لرینی زیارت قیلب کیلگن بر لبنان لیق سوداگر
آنده کی خلق آغز بدن ایشتنکن سوز لرینی واو لر نیک فکر واحوال لرینی نقل
ایتارایکن مونداغ دیمک ده دور ، تیمور پرده آرقه سنده کی خلق دین محاربه حتی ده
فکر سورالسده بر منوت اول محاربه نیک بولوشی نی همه سی آرزو ایتکن لیک لری بی
بیلدورادور لر ، کوب آدم لرغه سوزلادیم بیلمای سز لرمو ؟ بو کونلرده اوتوم وهیدورجینی
بومبه لری بیلان سوقوش بولادور ، کوب آدم ومملکت لر خراب بولادور ، سوقوش نیک
بولغانی یخشی ایماس دیسام ، مونداغ حیات دین اولگن یاخشی هر قا نچه بومبه لر آتیلسه
هم انسان لر همه سی اولماس ودنیا همه سی خراب بولوب توگاماس کوب آدم لر اولسه هم
قالغان لر راحت ده یاشاسه یخشی ایماس مو دیگن جواب نی بردی لر ، آنداغ بولسه محاربه
بولسه کونست لیق سز لرچه ینگیلادور دیسام ، اونده شک بارمو ؟ مونداغ بوزوق رژیم
یاشا مدور ؟ دیب جواب بردی لر دیدور .

بو تاجر نیک بو مملکت لرده اول تونوغان دوست وتونوش لری دین بری سیفی
تاپالماغان لیقی نی واورفاهیت ومدنیت مملکت لریده تورموش جهنم غه آیلانیب مملکت
ایچی قورقو دهشت لر نیک قرانگغو لیقی وقرا بولوت لری بیله قابلانغان لقیفی قیمت
چیلیق قین چیلیق لرینی تفصیلی ایله ومثال لر وتاریخ لر بیله کورسا تادور .

کونست لر نیک دین لرغه هجومی ، تورکمانستان رادیو سی اسلام مبدأ لر یغه
هجوم قیلمق ده . بو آی نیک ۲۶ سیده کی مانشستر جاردیان رورنالنده ، روس حکومتی

نيك دين لر ضدی غه بولغان هجوم لری نيك دائره سی کيگر ولائيب مسیحي دینی غه
نچوك هجوم قیلسه لر اسلام دینی غه هم شونداغ هجوم باشلاغان لقینی یازار ایگن ۱۲
اغسطس ده تورکانبستان پای تختی بولغان عشق آباد رادیو سی نيك دنیا غه یوللاغان سوزینی
کلنورمش دور عشق آباد رادیو سی شور لری سوزلامیش دور ، مارکس هم لینین نيك
تحلیل وتدقیقی دین نيك یمان لیق لری فی کشف ایندی ، اسلام دینی نيك یتنجی قرن ده
عرب لر نيك سرمایه دار لری نيك فایده سی غه ایشلامک مبدأ لری دین ، بر مبدأ بولق
اوزره وجود غه کیلگن لیکی بیلندی ، ایش چی لر نيك کوب چیلیکی اسلام غه اوزون
زمان قارشی لیق کورساتدی لر اسلام خاتون لر غه حقوق و آزاد لیق برمک غه مخالف دور ،
اسلام نيك اساس قیلندیغی روزه کبی مبدأ لر صحت اوچون ضررلی دور « دیگن دیک
قلم وتیل غه آیش دین انسان تارتیلا دورغان ادب سز سوز لر بیلان اسلام غه هجوم
قیامش دور (۵۴ / ۸ / ۲۷ . ۵۱) .

« وموندين باشقه روس لر نيك کوب گزیتته لریده دین غه ینگی هجوم لر
باشلانغان لیقی یازیلدی حتی اوتکن هفته فاتیکان خبری ده بابا نيك روسیه ده مسیحي
لیق غه بولغان هجوم لریغه احتجاج پروتست برگنی حقنده معلومات بریلدی بز مهاجر
لر نيك هر طرف ده کی جمعیت لر یمز وزعیم فرقه لر یمز بو حالت لرنی شیخ الازهر ومفتی
الديارالمصریه و دنیا ده کی اسلام مؤتمر لریغه بیلدیریب اونلر نيك احتجاج لرنی سوراماق
لری لازم ایماس مو ؟ اوتوزآلته بیل لیق هجوم بیلان قلب لرده الله دین امانت
اولاراق قویولغان دین حسی فی روس لر نيك تحی بترالما گان لیکی دین نیگی هجوم
لرایله ملتیمیز فی ینگی عذاب لر غه قارشی لاغان لیق لریغه سکوت آتمک گناه دور . (اداره)

دنیا حادثه سی : حیات دین استقاله برازیل غه اون سکز بیل حکم اتکن رئیس
جمهور ج فارجاس نيك استقاله آتمکی فی طلب قیلب بعضی ضابط لر نيك برکن طلب
لریغه جواباً اوزینی ۲۴ ده آتیب اولتورکن فارجاس مونیک ایله مملکت ده کی اضطراب
نی بتدی واورنیغه نائی ج فیلهو اولتوردی ، یریم ملیون کشتی جنازه سیغه حاضر بولوب
اوچ منک کشتی جنازه اثنا لریده هوش سیز بولمش « اولگن رحمت لیگ » دور ، بو ایچکی

واقعه دین فایده لانیب مملکت ده تنج سزایق چیقارمق غه اورونغان کمونست لرنیک حرکت لری تیز باستورولیش دوو . ج . ع . ۲۵۸ .

صونگتی کونلرده النغان حساب غه کوره تورکیه ده یوزیاش دین آرتقان ۱۵۱۶ ایرکشی ۲۷۸۴ خاتون کشی لربارلیقی و بولر تورکیه نیک شرقی منطقه ده یاشایدورغان اهالی دین ایکن لیکی معلوم بولیش دور . ۵۴ / ۷ / ۱۴ .

اولانغان آوچی : پاکستان نیک دکاشمیری غه یقین برکول ده برصیاد نیک قارماقی قرق بش قداق لیق بر بالیق غه ایلمغاچ قارماق نیک یفی بواغیر بالیق نی تارتیب الیب چیقلاغان دین اوزی سوغه سکریب توشارایکن بالیق اوتیکورتیش لری بیله صیاد نیک کمالی غه یاپوشمش دور ، فریادینی اشتکن خلق کیلب بالیق نی اولتوروب بو آدم نی اونیک تشی دین قوتولدورمیش لرایسه ده جراحی دین متأثر اولاراق برآز دین صونک صیاد اولیش دور . ۵۴ / ۷ / ۱۱ .

ایکی زک چوچه ، ایطالیا نیک فرانکو بولدوتی اسم لی ایسکین زارلیق ده برتوخوم (یومورته) دین ایکی چوچه چیقمش ۵۴ / ۱۱ / .

سرطان خسته لیکی و تماکو . امریکا نیک سان فرنسیسکو ده بر شرکت مدیری کیکر دیکی سرطان خسته سیغه متلابولغاچ بش تماکو شرکت لری دین اون آلتنه منک دوللر تعویضات طلب قلیب دعوی آچمش دور « ۵۴ / ۵ / ۱۱ .

چونکه انگلتره صحیه نظارتی نیک تماکو سرطان خسته لری نیک سبب لری دین بری سی دیگن اعلانی تماکو غه سرطان دیک یمان خسته غه متلابولغان آدم لرده زور نفرت اویغاندورمق ده دور . (تماکو چیکا دورغان لرغه عبرت !)

مصرده کی تاریخی اثر لر دین عمرو بن عاص جامعی :

مصر معتدل هواسی و مبارک نیلی ، و توفراق نیک تورت فصل ده بیپ یاشیل لیقی و تورو نعمت و بای لیقی بیله و چرایلیق منظره لری بیله . ممتاز بر مملکت دور . مصر قدیم مدنیت بیشیک لری دین مهم بری سی بولوق بیله نادر اثر لر غه بای بولغاچ اوزیگه دنیا نیک هر طرفیدین سیاح لر جلب ایتادور . و جغرافی موقعی تخی مساعد بولغاچ کوب سفر مصاریفی وزحمت لر یغه قاپلانیب آورو با و امریکا و باشقه قطعه لر دین همشیه زیارت چی لر کملک ده دور لر ، بو مملکت نیک پای تختی « قاهره » دین چیقا باشلاغان « آزاد تورکستان » حرمتلو اوقوچی لر یغه اونیک کهنه ینگی مدنیت و تاریخی اثر لر دین معلومات پارچه لری یازمق بیله دنیا نیک هر طرفیده یاشاب تخی مصر نی زیارت قیماغان قرداش لر غه بر تایکیسق هدیه یوللاغان بولورومو نیک ایله مسلمان لر نیک معارفه و احوال لرینی بر بر لر یگه تونوتقی غه چالشقان بولور دیب او یلایدور .

بو موضوع نی اسلام نیک مصرده انک اولتی اثری عمرو بن عاص جامعی حقیده کی بحمز دین باشلایمیز .

عمرو بن عاص جامعی (۱)

حضرت عمر خلیفه لیکه ده هر طرف لرده کی اسلام والی لر یغه مسلمان لر اوچون جامع لر سالماق بو یروقی بر یامش دور . هجری یگرمه برنجی (م ۶۲۴) بیل ده اسکندریه و حاضر قی قاهره فتح بولوب مصر اسلام نوری بیله نور لانغاچ مصر والی سی عمرو بن عاص حاضر قی اسکی قاهره ده اوزمان فسطاط (۲) اسم لی اورون ده بر جامع سالدور میش دور بو کونکه چه بو جامع عمرو بن عاص جامعی دیبه مشهور دور . تورلی قبیله لر دین او یوشقان اسلام قهرمان اردولری اولتورمق اوچون سالنغان فسطاط شهری نیک پلانی نی تمام

(۱) مقاله مین غه بعضی زیادت و نقصان اوزرینده « لواء الاسلام » مجله سی نیک ایکنجی عددی اساس تو تولدی .

(۲) فسطاط چادر دیمک بولوب عمرو بن عاص نیک انک اول چادری قورولغان یر غه اسم بولوب قالیش دور .

بو جامع فی مرکز توتاراق النمش دور ، فسطاط شهری بارابارا زورایغان چه بو جامع هم زور ایتمش واسلام حاکم لری نیک دائمی اهمیت لریغه مظهر بولمیش توزاتیلب چیکن لری چیکیلب (نقش و نقوش) زینت لاندورولمیش دور .

عصر سعادت ده کی حاکم ووالی وقوماندان لری ساده و بسیط حیات غه قانع ایدی لری اولر نیک اهمیت لری ایش ایشلامک ایدی کورونوش غه بریلماس لرایدی اولر دین و دولت ایش لرینی هان مسجد و جامع لرده باشقارا دورغان ایدی لری اونیک اوچون جامع لری بش نماز ، جمعه عید فریضه لرینی اوتالادورغان برجای بولمق دین باشقه اسلام تعلیماتی اوچون مدرسه مسلمان لری نیک معارفه والفت لری اوچون نادى (CLUB) دولت نیک أمر وقانون لرینی تارقاتا دورغان دولت اداره لری ودعوی لری فیصله قیلانا دورغان محکمه لری نیک ایش لرینی هم کورار ایدی لری .

عمرو بن عاص جامعى مذکور وظیفه لری نیک همه سى فی کورگن نیک اوستیگه مسلمان لری نیک مصلحت لری یتیم فقر لری نیک حاجت لری اوچون صرف قیلانا دورغان « بیت المال » خزینه سى نیک هم اورنی بولمیش دور . مصرده اسلام عرفانی تارالیش غه انک زور اورون بولغان بو جامع ، حاضر قی کونلریز ده کی اصطلاح چه ابتدائی مکتب دین تا کلیتیه لرغه قدر بوتون استعداد لری ایچیگه آلمیش دور ، بو جامع ده بسم الله باشلاغان برکیچیک بله مکمل زور بر عالم بولوب جامع قابوسیدین چیقار بولمیش دور ، اونیک اوچون بو جامع علم تشنه لری اوچون برچشمه حالیه گلش و بویوک علماء لری آنده نوبت لاشیب درس ایتمق غه باشلامیش لری ، متداول علم لردین باشقه عموم نیک ارشادی اوچون وعظ منبر لری ده مشهور خطیب وواعظ لری مخصوص ساعت لرده سوز لایدورغان بولمیش لری دور . ۴۱۵ هجری قاطمی لری دور یدده خاتون کشى لرغه هم مخصوص وعظ سوزلانا دورغان وعظ حلقه لریغه یرلریلگولانمش ، حتی اوزمان نیک مشهور واعظه سى ام الخیر حجازی عموماً وعظ حلقه لری نیک باشلیقی (رئیسه) درجه سى غه ترقی آتمش دور . امام شافعی رحمه الله ۱۹۱ هـ ده مصر غه کلگن ده بو جامع ده درس ایتمش ۳۳۶ هجری ده درس حلقه لری ۳۳ غه رتورتنجی قرن هجری ده بریوزاون غه یتشمش دور هر بر حلقه ده آز غنه تقدیرده یگرمه دانه مستمع (درس ایشتوچی) تخمین اتساک

مستمع لر نيك عدري ايكي منك اوچ بوز بولادور . بوزمان لرده ييگره منك طلبه غه تريبه برمك ده بولغان ازهر جامعي ده او وقت او توز بش غنه طلبه بوليش دور .
جامع نيك اوگزه سيگه توپلاشيب اديب وشاعر لر كون اولتوروش دين اول نيل بيلغه سي نيك خيرايليق منظره لريغه قاراب شعر وادبيات الهامي آلمق بيله بو جامع ده وجود غه كلگن ادبيات ونكته وقصائد لر كوپ ديوان وكتاب لرنى تولدورميش دور .
برمنك ارچيوز الليگ اوچ ياشيني مسلمان لر نيك احترامى غه مظهر اولاراق ياشاغان بو اثرى جامع محترم حال ده ساقلامق ده وپوتون دنيا نيك سياح واثار علماء لرى نيك مقصد وخزينه لرى بولمق ده دور . وان شاء الله مونداغ قالاچاق دور .

م . ا . اسلامى

بك قاينغولوق خبر

مجله ميز باسيلماق اوزره ايكن عموماً تورك و اسلام دنيا سى اوچون غايت قاينغولوق بر خبر ايله قارشى لاندوق اوايه : توركيه ده ياشاغوجى مشهور مجاهد وزعيم عياض بگ اسحاقى حضرتلرى نيك وفات خبرى دور
(انا لله وانا اليه راجعون)

مرحوم نيك قيزلرى پروفيسورس . چاغاتاى خانيم وكياولرى دكتور طاهر بگ . شاكر حضرتلرى غه وباشقه اقرباء وجهاد آرقه داش لرى غه خصوصاً ، ايديل اورال تورك عرقداش لريميز غه عموماً . تعزیه لريميز نى بيلدوراميز وهمه لريغه صبر جميل تيلاميز . ومرحوم قهرمان نيك جنّت الفردوس ده مجاهد وشهيد لرحه قارشى النماق نى الله دين ايشانجه ايله اميدايتميز ومرحوم زعيم نيك جهاد وفعاليت بيلان تولغان اوزون حيات صحيفه لرى دين كياه سى سان ده اوزومته لر آليب ايس لاماق واجييميز نى اولتامك غه بولغان آرزو بيميز نى بيلدوراميز .

اداره

مصرده تورکستان محله سی حالیدین .

مصر و تورکستان علاقه سی بیک اسکی دور . هر وقت ده مصر دین بویوک بر تورکستان لیق کتله نیک ایاغی اوز ولمامیش دور . حتی تورکستان لیق لر اسمینی ساقلا یدورغان اثر لر باردور ، تورکستان لیق وزیر لردین اتابک اوز بگ اسمیغه شارع اوز بگیه واو مناسبت له او کوچه ده بولغان باغچه غه اوز بگ باغچه سی بوگون غه قدر (حدیقه اوز بگیه) اسمی ایله آتالمق ده دور . بو کونلرده مصر تفراتی ده تورکستان لیق لر نیک بک آزاغان لری بیله برابر قاهره ده یگره ایکی عائله سوویس ده آله عائله اسکندریه ده بر عایله بولوب بر یوزاون یتنه جان تورکستان لیق لر بعضی سی تجارت و صناعت و وظیفه و بعضی سی علم تحصیل اتمک ایله هجرت کون لرینی کیچیرمک ده دور لر .

هر دائم مصر نیک ازهر و حکومت مدرسه لری بز مهاجر لرغه اوچوق توتولیش دور تورکستان لیق لر دین مختلف وقت لرده کوب آدم ازهر دین علم بترب مملکت غه قایتمش و بعضی لری حاضر خارج ده دور . بو کون لرده هم ازهرده اون تورت دانه تورکستان طلبه لری علم آلمق ده لر ، واونلر دین حاجی عبد الاحد عبد الله و حاجی علاء الدین سلجوقی و حاجی محمد سعید اسماعیل لر ازهر نیک انک بویوک صنفی تخصص قسم لر یغه یوکسالمیش و موفقیت لر ایله ازهر نی بتیرمک اوغرینیده دور لر . اوتکن بیل دکتور محمد امین یولداش و عبد الرحیم افندی حبیب الله و عبد الهادی افندی ایشان لر حکومت جامعه لرینی بویوک بر موفقیت و نجاح لرله بترب دیپلوما لرینی آلیب حجاز غه کندی لر و آنده بویوک خدمت و اورون لرغه کیردی لر ، بو کون یتنه حکومت مدرسه لریده سکز نفر اوغول و قیز طلبه لر یز باردور . مصرده تورکستان تکیه سی ، بو تکیه قاهره ده سلطان صلاح الدین ایوبی نیک قهرمان اسلام عسکر لری نیک جایی و یقین غه قدر مصر حکومتی نیک دولت قرار گاهی بولغان و اسلام عالی ده بک نادر بویوک و مطمئن جامع لر نی قورچاقیغه آنگان حشمت لیک القلعه محله سیده دور . ۶۹۷ هـ ملک منصور طرفندین تورکستان بقی عارف بالله لر دین تقی الدین البسطامی اسمیغه سالیب بر یامش

دور اونيك اوچون تكيه السطاي اتالادور . شيخ وامام لري دأما توركستانليق لر بولوب
كليش دور حاضر قى شيخى فضيلتو شيخ يونس دور كه مصرده كى وطنداش لر ايجيده
انك قديمى دور وفاضل بر ذات دور . ۱۹۲۰ ييل دين اعتباراً تكيه غه شيخ وامام
بوليش دور . تكيه صحى هواسى وحسن اداره سى ايله بر باغچه حالينى آليمش دور ، هر بر
كيلوچى كيتوچى توركستان ليق لرغه ايشكى اوچوق دور ومصرده كى بغيلش ومهمان
دارقمز نيك كوبي سى ينه بو تكيه ده اوتكاز الادور عنوانى نمر ۹ درب اللبانه القلعة
القاهره دور .

مصرده كى توركستان ليق قرداش لر يمز اجتماعى حيات غه هر دائم باغليق حال ده
باشايدور لر . ۱۹۴۴ ده قورولغان رسى بر توركستان جمعيت خيريه سى باردور ، رئيسى
شيخ يونس ومركزى همان تكيه دور و برده توركستان جمعيتى باردور كه « جاليه
توركستانيه » اسمى بيلان يوروتو لادور ، رئيسى عالم لر يمز دين مبشر خان تورم طرازى
دور . ومونده كى وطنداش لر نيك اكثرى جمعيت خيريه وجاليه توركستانيه غه اعضا
دور لر . ومصرده بوكون توركستان حقيده چاليشا دورغان ايكي مجله نيك بولوشى ده
مونده كى لر نيك اجتماعى حيات غه علاقه لري نيك كوچلون لقينى كورساتسه كرك .

توى

طائف (حجاز) ده اولتوروشلوق وطنداش لر يمز دين محترم حاجى نورعلى بخارى
نيك اوغلى حاجى عبد الله بيله مصرده كى هم شهر اردين حرمتلو حاجى صالح نيك عائله
سى نيك همشيره سى آراسنده نكاح وتوى مراسى توركستان تكيه سیده اوز دورولدى .
مصرده كى پوتون توركستان ليق لر اشتراك اتكن بوتوى غايت محبت لى وتوركستان
روحى ده كيچتى ، آخشامى خاتون قيزلر اوچون مخصوص توى ضيافتى اوتكاز يلدى .
يگيت و كيلين وهم اولر نيك اقرباء ودوست لرى غه بو مناسبت بيله تبريك
سوناميز وينگى قورولغن بو عائله نيك مجتمع اوچون خير لى بولوشينى وحيات لریده
رفاهيت وموفقت لر ينى الله تعالى دين تيلاميز .
اداره

بیلدیریش دوامی :

(۳) تنقید ونصیحت لر حرکت وکشی لر نی مکمل لاشنوروش اوچون انک یخشی وسیله لر دین دور ، تنقید ونصیحت لر نی کوتارالماگان تریککن، زیریککن بر حرکت یابر شخص هیچ وقت موفق بولمای دور ، فکر لر دائما محترم دور ، بز وطنداش لر نیک علمی تنقید خالص نصیحت وفایده لیق فکر لر یغه محتاج میز وفایده لانیس غه استعداد میز نی بیلدیرامیز .

(۴) بعضی قیمتلیک مقاله لرغه بوسانیمز ده اورون تار بولغان لیق دین ایکنیجی ساینمیز غه قالدوروش غه توغری کیلدی حرمتلو مقاله صاحب لری نیک عفو لرین سورا میز .

(۵) باسیاماغان مقاله لر کری قایتاریماس مقاله لر نی قسقاریتیب یازیش غه محله حقی دور .

قیمتی مضرده	بر عدد	۳	قوروش
» حجاز ده	»	۵	»

بلیق ابونه حقی :

حجاز اوچون	۶۰
واباشقه مملکت لر اوچون	۳
	دوللر امریکی

آزاد توركستان (تركستان الحرّة)

مجلة علمية ، دينية أدبية ، اجتماعية ، تاريخية وتوجيهية . تقدم صورة صادقة عن « تركستان المسامة » وعن المسلمين في التركستان البالغ عددهم أربعين مليوناً ، وكذلك تعرض المجلة فكرة واضحة عن الإسلام وعن العالم الإسلامي ، وتتقدم بجهودها المتواضعة في إخلاصها العميق وإيمانها القوي إلى مليون من التركستانيين المهاجرين الذين التجأوا إلى منازل الإخوة النبيلة والضيافة الكريمة في جوار حرم الله بالملكة العربية السعودية وشقيقاتها من البلدان العربية والإسلامية في أفغانستان والهند وباكستان وتركيا وإيران ، ومن الأمم الحرّة في مختلف القارات كأمريكا واليابان وبلاد يوروبا .

تصدر هذه المجلة باللغة التركستانية في أحرف عربية ، مرة كل شهرين بصفة وقتية صاحب هذه المجلة ومديرها الحاج محمد امين اسلامي ورئيس تحريرها الأستاذ محمد صادق عاشور دار المجلة : ٣ شارع سوق انضمار ميدان العتبة القاهرة مصر .

محتويات هذا العدد

صفحة	محتويات هذا العدد
١	بمناسبة صدور آزاد توركستان : التحرير
٣	صفحات من تاريخ التركستان « مقدمة » : بقلم محمد امين اسلامي
٥	تحية المجلة لعاهل الجزيرة العربية جلالة الملك سعود : بقلم «
٧	الاستقلال في نظر الاسلام : بقلم سماحة السيد مبشر الطرازي
٨	منزلة السيدة في الأسرة : بقلم فوزيه خانيم نافذ كريمة القاضي عبد الرشيد ابراهيم
٩	لماذا يؤرخ المسلمون بالتاريخ الهجري : بقلم محمد امين اسلامي
١٣	بيعة العقبة « حديث عبادة بن الصامت » من صحيح البخاري بقلم فضيلة الشيخ محمد يونس
١٤	كتاب « قوتاتقو بيليك » ومؤلفه يوسف خاص حاجب بقلم محمد امين اسلامي
١٧	مهزلة حجاج روسيا « الأرجوز المكشوف » : بقلم محمد امين اسلامي
٢١	القسم الأدبي : من رياض الأدب في التركستان ، ظرائف من الحياة ، الأمثال الشهيرة في التركستان . جمعها محمد امين اسلامي
٢٤	حول العلم
٣٠	مسجد جامع لعمر بن العاص « من آثار مصر القديمة » : بقلم محمد امين اسلامي
٣٢	نبأ محزن — وفاة الزعيم الكبير عياض اسحاق
٣٣	١٤ - التركستانيون في مصر : التحرير